

REPORTAXE

O MEDIO AMBIENTE NO CONCELLO DE AMES

CONVERSA CO FRANCISCO CARRACEDO

Despois do proceso electoral do pasado maio, novas persoas puxéronse ao fronte da xestión ambiental dalgúns concellos, e con elas aparecen no horizonte novos programas de actuación e posibilidades de avanzar na xestión ambiental, afianzando unha vía que nalgúns casos xa se iniciara tras os comicios de 1999. Este é o caso do concello de Ames, onde un pacto de goberno entre o PSOE e o BNG provocou un cambio radical nas políticas que se viñan aplicando. Ao fronte da concellería de Medio Ambiente está Francisco Carracedo Doce, con quen Cerna mantivo esta conversa.


Vostede ven de asumir a responsabilidade de goberno na área de medio ambiente no concello de Ames. Cal era o estado da cuestión no seu concello?

Cómpre dicir que moi poucas actuacións estaban en marcha. Nós rematamos a execución das obras do roteiro de Riamonte, que se iniciaran na lexislatura anterior; legalizamos e demos a coñecer esa ruta e encadrámola dentro dun proxecto moito máis ambicioso de creación dunha rede de itinerarios ambientais.

Por outra banda reiteramos a solicitude de subvención á Unión Europea, no marco do programa europeo LIFE NATURE, para levar adiante a protección, ao máximo nivel, do humidal da zona do río Sar que se inunda todos os anos. Houbo que correxir o proxecto presentado na lexislatura anterior e asumir, por acordo do Pleno, a disposición do concello para efectuar as expropiacións necesarias dos terreos.

En canto ao río Tambre, o tramo que discorre precisamente polo noso concello, entre o esteiro e o curso medio, é o único que non está incluído na Rede Natura da Unión Europea e iso ten, lóxicamente, uns responsábeis políticos determinados. O proxecto foi aprobado por unanimidade de todos os grupos políticos no Pleno. Agora estamos na fase do seu estudo pormenorizado e, probabelmente, haberá que sometelo a un estudo rigoroso de efectos ambientais.

Pouco ou nada paga a pena comentar sobre outras actuacións que estiveran en curso. O mais salientábel é a falta absoluta de concienciación sobre o medio ambiente. Constatar tamén como os estudos de impacto que acompañan ao vixente PXOM deixaron sen catalogar moitas zonas de alto valor, tanto desde o punto de vista da preser-



Francisco Carracedo é concelleiro de Meio Ambiente no concello de Ames

vación do patrimonio natural como do patrimonio histórico. Pretendíase non por ningún impedimento ao crecemento urbanístico. A ese traballo de catalogación teremos que dedicarlle agora os nosos esforzos e recursos.

O goberno de Ames é froito dun pacto postelectoral entre o PSOE e o BNG. En que medida inflúe isto sobre unha xestión política integral na área de medioambiente?

Tocoume xestionar unha concellería de Medio Ambiente en "estado puro". É certo que a Concellería de Servizos Básicos abrangue competencias que noutros concellos lle son propias á área de Medio Ambiente, como son, entre outras, a xestión do servizo de recollida de lixo ou a de parques e xardíns. Máis isto non impide que, coa necesaria coordinación, se poda por en marcha unha parte sustancial do ambicioso programa que o BNG presentou nas pasadas eleccións, nomeadamente no que atinxe ao tratamento do lixo. Moitas das liñas programáticas de actuación que se recollían nese programa,

inciden transversalmente nas competencias doutras concellerías como é o caso da de Desenvolvemento Local, Cultura e Deportes, Ensino e Patrimonio, Planificación de Obras e Desenvolvemento Rural e, por suposto, Urbanis-

Sair de SOGAMA para facer reciclaxe e compostaxe, fomentar o aforro enerxético e a enerxía solar, e conseguir o saneamento do río Sar son algunhas das prioridades do concello de Ames

mo. Pensa, por exemplo na incidencia que sobre todas elas tería a suscripción da Carta de Aalborg e a conseguinte implantación da Axenda 21 Local.

Entón, implantar a Axenda 21 Local pódese ter como obxectivo inmediato?


Pois en parte si. O acordo do Pleno da corporación para suscribir a Carta de Aalborg non ten porque non producirse neste ano. Por outra banda, iniciar os trámites para a contratación dunha

ecoauditoría e a implantación dun plan de participación social, non son pasos que se deban retrasar. Os orzamentos para o ano 2004 deben reflectir xa as partidas e os custes asociados a estas actuacións.

En canto á xestión do lixo, o concello está vencellado contractualmente a SOGAMA. É viábel cambiar o sistema de xestión no concello de Ames?

Nós tiñamos o convencemento de que na lexislatura pasada o concello se adherira ao plan Sogama por quince anos, pero despois dunha análise xurídica detida das cláusulas do contrato que nos vencella a ese plan, cómpre decidir que nada nos impede abandonalo e tratar os RSU que xeramos na pranta de compostaxe de Lousame. Neste momento estamos pendentes de recibir unha proposta económica por parte da planta da Mancomunidade do Barbanza.

Estou certo de que a comparación económica favorecerá a opción de Lousame fronte á de Sogama. Con todo, haberá que analízalo "con lupa". En canto a Sogama, non existe "lucro cesante" no seu contrato, polo que abondará con aboarlle as últimas pesadas de lixo que se lle adeuden. Outros compromisos contractuais preexistentes, como o contrato coa empresa que ten a concesión do servizo de recollida de lixo, tan só condicionan esta política de forma parcial ou temporal. Haberá que esperar até abril de 2005 para poder ter un servizo integral de recollida e tratamento de lixo.



A protección dos ríos e a depuración das augas é unha das prioridades ambientais para o goberno de Ames

E o grupo do PSOE, como parte do goberno municipal, está dacordo con esta política?

Pois si. No último Pleno Municipal ordinario, celebrado o día 8 de novembro, o propio Alcalde fixo manifestación expresa da vontade de apostar pola compostaxe en resposta a unha pregunta formulada por un concelleiro do Grupo Popular. Isto non debería ser unha sorpresa para ninguén xa que está recollido e asumido como un punto importante no programa de goberno conxunto que pactamos en xuño.

Xa para rematar, en que outras cousas estades a traballar?

Como temas prioritarios da axenda están dous convenios co INEGA, un para a realización dunha auditoría enerxética no concello, que xa ficara pendente da lexislatura anterior, e outro para estudar a viabilidade, o incremento de custes e as posíbeis vías

de subvención para a instalación de paneis de enerxía solar na piscina cuberta de Bertamiráns. Este proxecto sería asumíbel se non supón un retraso excesivo no prazo de execución da obra.

Por outra banda, cómpre levar con carácter urxente á aprobación do Pleno unha proposta de acordo institucional para que non se retrase a redacción do proxecto e a execución das obras de ampliación da EDAR da Silvouta, que como sabedes, se quere pospoñer até o ano 2007. Parece ser que o propio Presidente Fraga manifestou estar disposto a adiantar os cartos para esta obra se non se recollen as partidas que permitan facela efectiva antes do 2006 nos orzamentos do Estado. Veremos que hai de certo neste suposto compromiso. Ten en conta que a falla de capacidade desa estación depuradora é a responsábel de que o río Sar no seu discurrir polo noso concello teña a aparencia dunha cloaca.

Román Pérez

A CASA DA MOURA

rua da barreira 9 a coruña

Panificadora
• Xosé Nercellas •

**"Máis de 50 anos cocendo
 pan e empanadas
 en forno de leña"**

R/F, nº7 - 36500 Lalín
 Teléfonos: 986 780 309 - 986 780 281